



# Synfocity = 792

mail us at : [mzsynfo@gmail.com](mailto:mzsynfo@gmail.com); [mizoramsynod@gmail.com](mailto:mizoramsynod@gmail.com) - Phone - 2314648

November 19, 2020

## ☐ **Synod Committee peng hrang hrang an thu**

Synod Inkhawmpui atana Synod Committee peng hrang hrangte inruahman lawkna Committee chu neih chhonzawm zel a ni.

Nov. 16, 2020 (Thawhtanni)-ah Synod Education Board an thu a, Nov. 17, 2020 (Thawhlejni)-ah Synod Social Front an thu a, Nov. 18, 2020 (Nilaini)-ah SL&PB an thu a, Nov. 19, 2020 (Ningani)-ah Synod Worship Committee an thu a, Nov. 21, 2020 (Inrinni)-ah Synod Pastoral Committee an thu ang.

Synod Committee hrang hrang Meeting hi Rev. R. Lalchagliana, Synod Moderator-in a kaihruai a, Meeting-ah hian Secretary report leh Treasurer report te ngaihthlak a nih hnuah Synod inkhawmpuia report tur Secretary-in a buatsaih te ngaihthlaka sawiho a ni.

Nov. 23 - 25, 2020 chhungin Synod Finance Committee an thu ang.

Hripui leng mek avangin kumin Synod Inkhawmpui pawh kum dang angin hman a remchang dawn ta lova, chumi anih avang chuan Synod Executive Committee (SEC) meeting Nov. 10 - 12, 2020 a neih chuan ruahmanna thar hetiang hian a siam a. SEC chuan Synod Inkhawmpui hun pawt tawiin Dec. 8 - 11, 2020 chhungin Dawrpui Kohhran Biak Ina neih tura rel a ni a. Synod Balai tur pawh ti tlemin - Synod Puipate, Synod Nomination Committee te, SEC member te, Pastoral Committee member te, Finance Committee member te leh Superintendent, Synod Office te chauh palai turin ruahmanna a siam a ni. He ruahmannaah hian Mizoram pawn lam palai chu tel lo tura ngaih a ni.

## ☐ **Synod Mission Board leh ram pawn chet velna**

♦ Nov. 18, 2020 (Nilaini) thlenga Synod Mission Board hnuai Missionary leh an chhungte zinga Covid-19 kai zat leh Field hrang hrang dinhmun chu hetiang hi a ni:

Mipa 24 leh Hmeichhia 39

Hrikai zat - 63

Enkawl lai - 12

Enkawl dam - 51

### **Field hrang hrang dinhmun:**

<b>Field</b>	<b>Hri kai</b>	<b>Enkawl mek</b>	<b>Dam</b>
Arunachal & Assam Mission Field (East)	6	0	6
Arunachal & Assam Mission Field (North)	5	0	5
Arunachal & Assam Mission Field (West)	15	0	15
Assam	2	0	2
Barak	6	0	6
Delhi	9	7	2
Karbi Anglong	2	0	2
Kolkata	1	1	0
Masihi Sangati	1	0	1
Nepal	3	2	1
Tripura	13	2	11
<b>TOTAL</b>	<b>63</b>	<b>12</b>	<b>51</b>

### ♦ **Barak Area Mission Field**

Nov. 12, 2020 (Ningani) khan Karimganj Pastor Bial, Indurail Biak In chu Bialtu Pastor-in a hawng. Indurail kohhran hi kumin a ding thar anni a, Bial Evangelist ten Biak In hi Workcamp-in an sa a ni. Motor kawng kal tawp atanga ke-in Kilometer chanve vel la kal ngai a ni a. Biak In thar hawnnaah hian Bial chhung atanging kohhran member leh thawktu mi 60 chuang an kal a, kohhran member pakhatin kel a thawh a, chumi chuan ruai kilho nghal a ni.

### ♦ **Arunachal & Assam Mission Field (East)**

Nov. 15, 2020 (Pathianni) khan ringthar 4 Lal Isua zui turin an inpe a, hemi ni vek hian Jairampur bial chhungah Kabang Preaching Station thar hawn a ni bawk.

◆ **Arunachal & Assam Mission Field (North)**

Nov. 15, 2020 (Pathianni) khan ringthar 5 Lal Isua zui turin an inpe a, kohhran dang ațangin chhungkaw 1 (member 6) kan kohhranah an rawn lut bawk.

◆ **Assam Mission Field**

Nov. 15, 2020 (Pathianni) khan ringthar 2 Lal Isua zui turin an inpe.

◆ **Jharkhand Mission Field**

Nov. 15, 2020 (Pathianni) khan ringthar 1 Lal Isua zui turin an inpe.

◆ **Home Mission North**

Nov. 15, 2020 (Pathianni) khan ringthar 7 Lal Isua zui turin an inpe.

□ **Synod Relief Fund**

Tun hnaia harsatna hrang hrang neite hnenah Synod Relief Fund ațangin chhawmdawlina hetiang hian pek a ni.

S.No	Khua	Pek chhan	Chhungkaw zat	Pek zat
1.	Vairengte	Hliam tuar	7	Rs. 23,000/-
2.	Joint VC, Vairengte	-	-	Rs. 10,000/-
3.	Joint YMA, Vairengte	-	-	Rs. 10,000/-
4.	VLTF, Saihapui 'V'	-	-	Rs. 5,000/-
5.	Thinghlun	Vanduaina tawk	2	Rs. 20,000/-
6.	Tualcheng	Damlo	1	Rs. 8,000/-
7.	Vaikhawtlang	Damlo	1	Rs. 8,000/-
8.	Bangalore	Khawsak harsa	1	Rs. 8,000/-
9.	Bilkhawthlir	Damlo	1	Rs. 8,000/-
<b>TOTAL</b>				<b>Rs.1,00,000/-</b>

October thla chhungin Synod Relief Fund ațangin harsatna hrang hrang nei te hnenah chhawmdawlina leh tanpuina Rs. 1,90,000/- sem ral a ni.

□ **Sunna : Rev. John Sharma, kum 55**

Rev. John Sharma, kum 55 chu Cancer avangin Nov. 15, 2020(Pathianni) tlai dar 4:45 khan Synod Hospital, Durtlangah a thi a, Nov. 16, 2020 thawhtanni khan Rev. F. Lalrinnunga, Ex-Moderator, Mizoram Synod in Zotlang YMA Hall, Aizawlah a vui.

Rev. John Sharma hi Jan. 6, 1965-ah East Lumding, Nowgong, Assam-ah a piang a. Hindu chhungkua a pianga seilian a ni a, mahse Lal Isua hnung zui tura a in pek takah chuan a chhungte hian an tuithlar ta a ni. Baptisma a chanin a hming hi ama duh ang ngeiin John Sharma tih a lo pu ta a ni. December 10, 1985-ah Anjali Sharma nen Zotlang Kohhran Biak Inah inneiin fanu pahnih an nei a ni. Kum 1989 Synod Inkhawmpui-in Pro. Pastor atan a la a, kum 1990 - 1991 chhung khan Siliguri Pastor Bialah Pro. Pastor hna a thawk a. Kum 1992 chhung khan Bawngkawn-ah Pro. Pastor hna thawk chungin Hindi Bible School-ah Zirtirtu hna a thawk bawk. Kum 1992 Synod Inkhawmpui-ah Pastor atan nemngheh niin Bial leh hmun hrang hrang - Siliguri, Hatiadanga (Siliguri Field), Masihi Sangati(Lunglei), Principal Hindi Bible School (Bawngkawn), Dharan Bial (Nepal)-ah te a lo awm tawh a. January 2020 ațanga a hun tawp thlengin Masihi Sangati Kendra, Bawngkawnah a thawk a ni.

Rev. John Sharma hi Nepal-a a awm lai kum 2018 khan Cancer a ni tih hriat chhuah a ni a. CMC Vellore-ah enkawl niin Doctor ten theih tawpin an enkawl a, mahse that lam a pan lutuk thei lova. Amah hian Mizorama Kohhranho te tawngtaina a thlahlel hle thin a, a beisei leh a thlakhlelh ang ngeiin Kohhranho te tawngtaisakna a dawng nasa hle a ni. A hun tawp lamah hian Synod Hospital, Durtlangah Doctor leh Nurse ten theihtawp chhuaha an enkawl chungin Nov. 15, 2020 tlai dar 4:45 khan a rawngbawl sak Lalpa hnenah a chawl ta a ni.

□ **Hruaina Eng FM Radio**

**NOVEMBER 20, 2020 (FM Zoawi - Aizawl & Lunglei @ 7:30 p.m.):**

**Solo** : Esther Lalthianghlimi - A la tlai lo

**Zaipawl** : Champhai Vengsang Bial Zaipawl - Nang i thianghlinsi a

**Sermon** : Rev. Dr. C. Chawngmingliana - Thusawm pek

**Solo** : Ruth CVL Muanpuii - Ka famkim ta.

❑ **Susamachar Prasaran Programme :**

**NOVEMBER 22, 2020 (Pathianni) 5:00 pm. :**

**Group/Choir/Solo :** Bungkawn Masihi Sangati - Pyar ka sangar, **Group/Choir/Solo :** Dawrpui Bial Masihi Sangati - Jaya, **Sermon :** Lalhmingthanga, **Group/Choir/Solo :** Hmingtea Tochhawng - Aaya ishu mere jiwana me, **Group/Choir/Solo :** Kristian Centre Zaipawl - Tu Pyar Ka Sagar

❑ **Moderator leh Executive Secretary-te Programme:**

**Rev. R. Lalchangliana : Moderator**

Nov. 23 - 25, 2020 Synod Finance Committee

Nov. 27, 2020 OM

**Rev. Lianhmingthanga Sailo : Senior Executive Secretary**

Nov. 23 - 25, 2020 Synod Finance Committee

Nov. 26, 2020 TEB

Nov. 27, 2020 OM

**Rev. B. Sangthanga : Executive Secretary**

Nov. 23 - 25, 2020 Synod Finance Committee

Nov. 27, 2020 OM

**Rev. K. Lalrinmawia : Executive Secretary**

Nov. 23 - 25, 2020 Synod Finance Committee

Nov. 27, 2020 OM

**PATHIAN THU ZIR DUH TAN**

Presbyterian Bible School, Mission Veng-ah Certificate in Theology (C.Th) Admission hawn a ni a. Dil duhte tan a hnuai tarlan hi hriat tur a ni e.

Admission Form : Office hun chhungin Rs. 10/- a lei theih a ni  
 Dil hun chhung : November 27, 2020 (Zirtawpni) tlai dar 3:00 thlang  
 Dil thei chin : Class VII passed, kum 16 chin, Kohhran dan chhunga awm  
 Interview : December 1, 2020 (Thawhlejni) chawhma dar 10:00  
 Class tan hun : January 12, 2021 (Thawhlejni)  
 Zir hun chhung : January - April, 2021

Hrechiang duh tan Phone No. **0389-2317343/8201377892**-ah zawh theih a ni.

*Sd/-*, Rev. P.B. Zosaphara  
**Principal, PBS**

**MISSIONARY TRAINING COLLEGE HRIATTIRNA**

Missionary Training College(MTC)-ah Bachelor of Missiology (B. Miss) zir duh tan dil theih a ni leh ta. Dilna Form leh Prospectus hi Rs. 50/- in Office hun chhungin MTC Office atangin lak chhuah theih a ni e.

Dil thei chin : CI-XII pass chin  
 Dil theih hun chhung : November 15, 2020 - February 8, 2021  
 Entrance Test : February 23, 2021 (9:30 AM @ MTC)  
 Interview : February 25, 2021 (10:30 AM @ Synod Committee Room I)

*Sd/-*, Principal  
 Missionary Training College  
 Mission Vengthlang  
 Ph. No. : 2310157/2301337/9612164982